

四庫全書

集部

欽定四庫全書

集部

弇州續稿卷一百八十六

詳校官編修_臣潘度筠

侍讀_臣孫球覆勘

總校官進士_臣楊懋珩

校對官檢討_臣王鍾健

謄錄監生_臣張賦京

欽定四庫全書

弁州續稿卷一百八十六

明 王世貞 撰

文部

書牘

答吳總督

始中表陸生造謁門下時索貞一書先容貞以門下深
仁衣被紳裾無一失所而况陸生有布衣之舊落魄已

極必在所憫豈敢借門下之澤以爲己潤以故不敢應
暨陸生歸則門下先賜牘下存慰藉深至織文之絲比
華繡段紫端之石並美青玉使貞慙感無地陸生手一
編乃門下前後功次意使貞紀之貞年來衰嬾之甚於
筆硯間滋味淡如嚼蠟小有肅應散若團沙門下知愛
之素不敢自秘其拙惟是二廣之所不乏者功也門下
無快意無覬心日以清德先之以慈憫行之恒使鸞鳳
之意勝於鷹鷂漏網之寬隄於血刃此則貞之所深悉

而竊效發揮於一二者也陸生之嗣子行便卿此附聞
元功告成旦夕入輔山澤之癯無由嗣接音塵南望興
懷耿耿不一

王總督

嚮者猥辱大誨注存匆匆報言未罄固心儀之矣我翁
文武並用爲國之禎凡有識知靡不拭目以期鐘鼎之
業茲者召自東山晉鑰北門遼左之威等於雷雨薊鎮
之固隴於金湯師中三錫已徵其一矣岨嶠大司馬開

豁大度秉樞之後得翁爲代真若李臨淮之繼郭汾陽
精采一新詎直蕭規曹隨而已哉貞雖誤習雕蟲久已
厭悔年事衰遲心力疲竭卽有筆札肅應僅堪覆瓿而
我翁過垂獎借不惜齒牙且使於大司馬諸牘當糠粃
之尊真足愧死念使者僕僕三千里勉爾塞白倘不靳
梓人須痛賜斤削庶無貽笑草次附復未竟所懷秋氣
向暮唯爲宗社順時自愛以迓隆眷不宣

溫司徒

老丈開府全浙下走杜門故里雲泥既殊且乏生平之
素而遠書慰存貺幣繼之且使薦其敝帚瀕行繾綣不
能自已乃知尺素論心遠逾會面千里神交賢於比鄰
殆非虛也有致翁卹災疏稿至者讀之以爲剴切懇至
當事者行之三吳垂死之民庶幾有起色及聞疏至都
而見尼物情鬱鬱然未嘗不加額願翁之有後也貞父
廢過時之人絕意世途而晚復見飾蛾眉混沌勢不容
已覩顏一出慙沮無地所冀羣龍滿朝非日可藉手拂

衣耳齋疏人去聊附候私不一

寄胡司徒

公衮衣江左既覆露我而復食我禮我行臺之夕以部
內人才賜權不謂齒頰餘生亦賜收采不然之灰豈堪
作藥籠中物恃以篤舊之深等之遺簪敝履使稍有顏
色草野間耳昔人云知己重於感恩貞豈敢一餐而忘
左右第此身作佛奴長安貴人問遂久荒絕若磬例通
此政恐不免見唾揚太尉計不以我落落也江左行臺

大夫周吉水王三原明敏博大故當歸之若清公慎勤孜孜奉國自燥髮以來未有見如我公者白面書生始自願指既而傳聲既而求勝不勝不止此真可爲太息流涕也第廟堂眷注愈深而我公求去愈決君臣大義政自瞭然計天池之息不過六月公既富於春秋天又相假以喻壁之陰便當尋本來面目作出世計即異日吐其餘經世不過滄海一滴耳貞甚悔擲此日於雕蟲蠹魚中譬之奢子產盡始曉作活雖復無成亦或可免

溝瀆也荆石宗伯家刻曇陽大師編并有薄物將遠臆
不拒爲荷家弟行部或得相聞唯有以教督之

又

西秦東吳相去萬里欲附數行於鱗羽而不可得歲前
見翁起自巖壑復領鄴侯之寄不勝私慶以爲國脉民
命必須精忠勁節膽力俱稱者任之大司農非翁不可
而貞一衰懶過時之人絕意世路久矣乃亦從翁後而
玷除目良切慚愧特以先君子被國恩至再而貞之被

命者亦至再若復偃蹇稱病以自爲名人將不食其餘
故亦黽勉而出今抵任矣馬力易墮鵠原在念豈敢上
比我翁同日而語耶昨歲一遣人謝恩一遣人乞骸皆
以未得翁入朝之報不敢具瀆而最後去人以一槭見
歸槭啓而榮光驟發則大教在焉恍若覲眉宇而奉談
笑何貞之疎而翁之厚也故鄉板蕩且爲魚鱉皆舊所
拊循之赤子也唯爲一軫慮是祈齋疏役便附布區區
不悉

寄胡雅齋司徒

自三歲前從家弟處得門下一書旋有報啓嗣是間闊
焉雖鱗羽之徑絕然於此心未嘗夢寐忘也昨春從邸
報覩薦剷除目甫爲小快而旋有齟齬者真令人氣塞
所謂王尊一身何乍賢而乍佞耶屈指戊寅冬篝燈促
膝微言在耳猶自宛然蓋此老疑根之未除而吾吳俗
薄惡有以成之也間與元馭先生談及相與振腕以爲
毋論才力若明公即清慎勤三字舉世孰有相擬者唯

邇來郭中丞其爲小民稱說頌美毋異於韓黃二潁川而亦不免夫郭公之不免則世路之責而使明公之不遽伸則吾吳人責也元馭今大拜矣苟壹志爲縣官論材修古上臣之道當安能舍明公與郭公僕自廢且老矣坐蒲團三尺起此五嶽方寸羈提所不與也適寧夏張中丞有一使便附此不知能達記室否語及悵悵何時見旌麾出函谷關動我西嘆不一

答馮文所提學

昨蹶躡東徙案頭無一書卷而倉皇完十餘宿逋其文
多不經意而偶自斐然獨最愛執事集最欲有所效而
瑣弱不成語不知其何祥也豈吾西竺所謂緣也耶使
者甫發而執事教札復繼之其卓說宏麗亡復論抑何
感慨蓄育深且至也僕老矣且感先師名根之砭恐恐
焉若古之畏影而馳者偶記桓文之業皆練卒侵壤以
成其資故一戰而遂主齊盟宋襄以彈丸之地欲用其
虛貴假義抗鵬張之楚故一盟而輒見辱今執事之兵

選矣其壞廣矣文武之胙舍大樹奚適即世有宋襄何足虞也執事所論胡元瑞甚精而亦甚公沈雅閒適是渠所短於此得一針膏肓之痼當便脫矣彼自負誠太高雌黃月旦亦不自禁然未至如所聞之甚當由貴鄉一人傳之過耳家弟誤被時趣不能終固簿書奪之則無有整師而抗執事者自愛自愛佳集當更卒業不一

沈少宰

獻歲方新台履萬福入奉經術以沃眡聖德出秉藻鏡

以登進善類益不待爰立之命而賢者功用已大光顯矣豚兒歸備道翁惓惓至意不以塗龜之踪是棄而謂雕虫之技可收至欲見委贄述先德而李使君至則首爲翁致拜托拳拳之命貞雖謗劣無狀特冒調詞之戒儲筆硯以待久矣巖穴遺者收錄殆盡不謂謗劣遂爾濫竽雖愚無所識知當此聖朝夔龍濟濟亦思自拂拭以仰觀其盛而自昨春一病淹歷三時爲醫藥所挽得稱人於世然髮墮齒落精神銷亡燭之武之少尚不如

人而况老耶且自庚辰之春以死灰自期避處空門一
蔬一褐苟免饑寒藉以沒齒鄉里之人亦有信其隱淪
者今併此匹夫硜硜小節而棄之復何取也小疏乞骸
情出由衷唯蚤賜覆得爲太平之民萬萬足矣春氣漸
和爲道爲蒼生自愛

與夷陵王少宰

前者浮言洶洶時貞不勝其鬱懣輕破山野之禁輕吐
其愚以瀆尊重而門下不以爲譴而慰之且聞事起時

曲垂弘護使調達善星厲謗不至滔天貞與荆老得以
苟存一畝之宮焚修飲啄不至顛沛皆大賜也夫陰翊
善教保完豎儒此自門下宿植福因亦是將來不思議
功德貞無所用感無所用報第反之此心有不容已者
敢因荆老使便布其區區門下景星卿雲海內共仰加
以赤誠推人洞見底裏悠悠易生毋論荆老即貞聞之
亦付之一笑何足動門下方寸哉柱石之軀萬萬倍加
保愛汝泉小魯二老素辱知念自惟麋鹿之跡不敢上

援冀門下清閒之燕一言叱及而已餘不復贅

答戚少保

族子藝持一歌欲以薦之門下托僕先容僕讀其詞而壯之爲作數行相寄却從渠得明公前茅消息欲操輕刀奉候於吳閭而足跡不蹈其地者四載所矣第掃弁園一片石以庶幾追踪浣花之遇而今晨使者忽至拜手札勤拳至愛迫於簡書忽忽南指僕寧無清夢逐五羊使者飛熊之旆乎漁陽十載能使隍堞盡爲金湯天

驕斂迹黃屋增崇蒙內史趙營平不足相擬而一時借
公以南彼雖耽耽其視一旦奪魄寧能遽作秦會之乎
嶺表素服威名雙甄所指瘴癘全消尺檄甫馳鯨波自
偃計無足勞公神者異日萬戶侯卽當於莽首乎取耳
道人不當復作此語爲公一擊唾壺勿訝勿訝過錢唐
想當與肖甫司馬周旋附數行與之公至嶺有一札寄
黎吏部益爲其乃父惟敬致生芻耳渠里中有故岑給
事用賓者於僕有知己恩爲一訪其詩文此間欲刻之

過此當掩關焚筆硯也不腆將敬逆近作山園數記博
一解頤餘唯加飡自愛

又

夏時辱手教雲葛之貺草草奉答未悉所欲吐茲復承
大誨及縻絲魴杯種種珍惠公毀家以養壯士不足而
又損橐中裝勤存故人且僕土木之軀不堪文繡久矣
一褐一苧足了寒暑兩月來遂斷米汁皆無所用之特
以雙魚萬里其尾盡頽恐重累行李不敢不拜嘉耳昌

黎蒞潮鰓魚爲徙今公甫杖鉞而鯨鯢竄伏海波不揚
文武爲憲效固章章若是第何以取徹侯卽歸從赤松
子耶僕之不能出雖坐不敢負香火一念然亦內揣筋
力外察事幾餘日無多堅冰可畏故雖上負國恩下負
知己有所不能顧耳公高我以輕世之節而厚我以度
世之事却非所敢當也伯玉司馬六十僕固願爲效一
言之祝而適其姻人黃光祿來請業已許之公之愛司
馬與不佞夫豈光祿所可同日語以故不免刺促子墨

今錄去或不堪疥司馬壁則且置之何如公又謂明年
當援司馬例而壽我則又所不敢當也伯玉之文豈直
玉案瑤瑤而已第僕所謂不敢當者其說有三先大夫
中讒飲恨壽僅辭天僕自過五十四來便忽忽愧生而
豈忍以六十言賀驕我先人一也二者司馬爲文必以
蛾眉飾我而僕行能下劣亡可比數嫫母之飾愈增其
醜二也先師戒辭遺訓懇懇爲名作戒而乃犯之三也
且僕以五日後入深林焚筆硯公亦無從跡我即跡我

亦不能報勿訝勿訝岑給事賴公與支學憲不朽僕自
前草一序少徇知己而使者適至今并報支君書附上
幸轉致之此二文當亦稱絕絃矣藝姪從事幕府苟竊
升斗以糊其口爲幸已弘乃重辱齒牙之借耶姚老習
養生亡所歸而後皈命西方技亦窮矣第其所生雲仙
子者却是傍門第一流公欲固此色身不可失也秋氣
益深南中當亦佳是愛

又

清洋一別此心搖搖若懸旌於蓬萊三神之下矣送者
至丹陽即知仲氏柳塘公大變南越夜郎相去萬里幸
先後解組可以填麓丘壑而造物妬之若此不能不令
人致恨於缺陷世界也仲冬得肖甫司馬一札是時猶
在鎮惓惓以老大爲念謂北門鎖鑰折衝萬里非公不
可托僕致意累百餘言昨得塞中丞數行亦具道邊事
無可賴者惟賴公與譚襄敏公故所築敵臺耳必不近
捨魏尚遠思頗牧第聞黠敵轉驕歲幣日益皆私取之

部士月餉鷄衣鵠形一貧刺骨即巧婦如公能空鑄作
飯否汪司馬近挾二仲與龍徐二司理來高會數日杯
酒毫翰間談大雅不置隨憩金焦溯流攝山栖霞度暑
僕恨未能從也邇來賴庇頑健大兒塌翼得周旋左右
兩小者備名學宮不至落莫想公所欲聞者止止堂集
序勉爾塞白殊不足災木也雅貺拜嘉附有縞敬幸不
罪鄙褻爲荷

答吳司徒

世貞向者自廢草莽而我公方步武天衢黼黻帝藻唯
間從一二交游耳高譽沾餘馥而已匹夫之節不固苟
出應世始獲以名姓相通而識荆一念蓋至於今猶闕
焉門下建牙握節掃瘴煙而日月之旂常之績與新息
銅柱爭雄計相特召三台在邇而太夫人在念毅然請
告天下高其事而懿其心乃令甥來將大教腆幣則以
太夫人幽宮之石見托誌銘慙然顏汗又以太夫人之
美節姱行福祉壽考於海內寧有幾門下之爲勛臣爲

循吏爲名儒正士於海內復有幾而天子之所以寵靈
光大其歿存者又復有幾而不朽之重委之謫薄無行
齒頰狼籍之人何也世貞自昨歲來棄妻子草衣木食
於筆硯都已謝絕而門下業已爲知己又令甥數千里
扶服道路不獲自蔽其醜唯更斟酌之勿使災石可也
柱石之軀幸自抑嗇以終大孝

王司徒

嚮者台旌北上山中得邸報艱欲馳一啓奉候而不可

及矣國家根本在積貯而積貯取給東南今以大司徒
之政畀之正大精詳之人如我翁者固六軍萬姓之命
所仰係而區區東南桑梓之私尤可藉以衽席者也癸
未比壤皆稔而獨敝州與嘉定以民力之不給與雨之
不時潮水之不及濟稻禾半焦加之颶母疫鬼積雲之
餘民尚未有起色也唯我翁一念之而已世貞謗劣齒
頰餘生逃墨自放無復世念而除目濫及此必我翁與
二三大老念舊推轂之效第蒲柳易衰樗櫟無補非復

東土周還左右時精神意氣矣且諸賢在朝與彙征茅茹者皆一時之選而以不肖之軀參之所謂腐骨餒魚能敗鍋羹者其不重貽知己之辱耶抗疏乞休實出衷臍倘會夢翁臺老幸一從臾不至再瀆幸甚干瀆尊嚴無任皇悚之至

御史大夫吳公

自翁之晉領中臺持天子綱也貞時卧田里彈指稱慶曰國是自此定矣既而連得覽所上大疏皆鑒鑒中窾

而至挽留耆碩旌禮恬退於盛世之德增光重焉所謂
通達治體奚讓哉貞衰劣過時托跡方外不齒人數久
矣上恩霈及先魄誼無可辭冒昧苟出竿祿無補慚負
益深如何如何昨者海公憫念閭閻之苦有所減省行
之二年獨於貴院所列守宅更夫一事諸公持之甚力
是以遷延至今昨始覆上所謂寬一分民受一分之賜
者也伏惟尊裁幸甚餘不敢贅

答徐太常伯仲

前者徐孟孺稱師翁道體漸康以故於元馭宗伯便僅附一書通臆不復走介卓午而孟孺書到忽傳有非常之耗且駭且疑少間則使者所將之計繼之矣痛哉痛哉天不憖遺一老海宇失望元龜何托赤幟何表至於區區顧凱羊曇之感蓋不止懷依鎮海支策西州而已孟孺致尊諭計遺疏事且令具草憶得先朝大臣自景泰以前所未創見惟天順中寧陽侯陳懋太平侯張軌文安伯張輓成化中會昌侯孫繼宗三四勲戚而已嘉

靖之季李顧二文康時在位故有之若晦菴永齋林下
諸大老皆不聞也當是時林尚書俊以尸諫忤旨顧尚
書可學以覲恩見譏非例也第我師翁光輔二聖功在
社稷八袞時受主上隆禮大眷以此隔恩納忠或不妨
破格耳不揣庸陋僭擬數言馳去須與與繩司空一商
議却付大兄詢之三老可上則上不必拘也三五日間
即當奔哭几筵面悉不次

荅李太僕生時

僕匏繫一茅廬百事沈簡而獨生平故人尚在方寸第
以授家兒輩僅挾兩蒼頭自隨不欲從之借殘力通訊
問公乃能念我千里裹糧授使者竿尺慰存副以煙霞
之貺何感如之公待次以爲侍太夫人朝夕不能遠宦
雖公家令伯何以過是時事殊可觀暫出應彙征之數
染指而歸亦無不可僕槁木之軀豎子尚見凌得公寄
萬氏抄藥方良足山中生活矣不腆刻佛道經數種并
山園記附覽不一

荅陳太常

昨歲以館師柴氏役便附通起居辱報書滿紙皆肝腑
之愛而柴氏舉宗荷長者盼睞不至白貸以其家完會
有先師羽化事卒卒無由致咫尺之書以謝迺者復拜
大誨過賜飾獎捧讀之餘良切皇汗走荼毒餘生僂以
時私不知創悔墮人齒頰歸田以來百念灰冷而猥承
靈真降憫汰其臭濁俾吸清冷非分之來莫審所以今
雖損家付豎子木食草衣作焚誦行逕第返省內境則

豈足凝承大貺解脫世外倘即未填溝壑獲以餘日息
黥補劓小省泥犁種子足矣翁丈步武鼎鉉潤澤士庶
舉口動筆皆是陰功若復澹泊明性蓬戶朱門何所不
可先師垂訓以八戒爲先其教走與宗伯公亦只寡慾
薄味省事去思固靈根之本以俟將來頂門一勺甘露
而已此外都未有及也走生平綺語方在懺悔即有撰
述愚賤無徵而宗伯公見強爲傳良非獲已今既已露

之無由更秘敢附上十冊其宗伯所撰行實秘之青箱
適聞爲一友竊而梓之俟其成當別奉也辱諭聊此奉
復呵凍不一不一

荅周鴻臚

貞齒頰之餘人世長物力不從心懶與邁會故塊處一
室竊比於息黥掩劓之人而已而門下念通家未行之
雅惠以教言過垂獎飾使蘇壤登筵春容大章見屬弁
辭使糠粃尊玉愧何可勝嘉降之際斗山東南貞僅從

邦人側耳芳問而已不謂垂晚得披璫林寶藏應接不暇別梓諸大疏便是賈長沙雖失意絳灌尚足聳動朝野自是而後多角嶷嶷僅能觸懦夫孺子而已何所得公一卮語也中間先君子朽鬼仰賴榮施事雖不行亦爾小吐誦之不勝九京之感以故不敢持筆硯戒勉效一言第謏劣不足傳亡以報塞如何如何次公材高小鍛鸞翮與時揚抑以成變化埴簏之暇幸勉之勿遂作鑿坏計也初暑爲道加食自愛

又

昨自仲君起部返而薦其敝帚以爲佳集之導至於今
愧之不意明公復以先光祿翁之不朽托也讀所狀佐
邾邑事令我神爽尹翁歸所謂文武具備者非其人耶
而奈何以格阻之然有賢伯仲足以償矣自惟先司馬
身後明公倡正議於朝即格不行猶有生意僕敢忘筆
札報而病瞽忽忽且仲君見迫甚不能效沈淫之思幸
毋即災石不然爲我斤斧焉鄉帛附忱殊慙簡褻希鑒

入朱明迫矣謹拜簞葛之貺以助我懶爛然之幣敢附之仲君毋以不恭而罪之天下之軀強進饘粥爲禱

又

昨歲婁承教札深叨念存邇見次公佐無爲之報知尊服已禪除書旦夕下矣廟廊搜剔巖穴僕之不肖亦且竽濫而况明公與侗老皆具內聖外王之學斯者乎第僕衰病無狀且有心盟惟知鑿坏而已年來爲筆硯所役忽忽成瘵已於新正誓斷之而黃解元者以明公之

教札來爲渠王父憲副公不朽計奈何許之是僕不免
誑語誓也不許是二千里之匍匐與明公之命皆委之
草莽也殆將以此爲絕筆矣次公計已之任大白若辱
盛德若不足幸致聲告之不一

與王尚寶

自庚辰來忽忽塊處於道無絲髮之進僅能以嬾慢疏
離戚故之交而已執事北上既行而後知之某始則爲
言路所踪幾有竄逐之累其後則復爲言路所與謬從

推轂之末以故不敢一通長安問雖至厚如執事者亦
付之漠然誠知其非謂執事必見亮於形跡之外也始
聞建禮之除復覩尚璽之報出入禁闥密邇天顏固一
時羣公推賢求舊至意然後來之薪得無又前積耶僕
已賣身作佛奴而留尹一補良所不解雖不然之灰無
所復動而上章投啓紛紛者數日唯冀諸賢一從叟使
守此丘壑足矣仲君別駕邢州宦况想佳勝不一

王鵬臚

前者草率附謝自愧不腆茲復承雅誨敦促上道且謂僕躡履石頭之辰正門下挂冠神虎之日也僕初以衰劣不堪仕路而病弟方在湯藥故上書陳情乞骸今既不得請而病者粗有起色且貪與盛德周旋少時不免圖買舟小一出耳然門下既深叢桂之招僕亦何心小草之戀耶唯是太僕官署名爲仙府意必大雅居之而邇來山公啓事多好輕俊少年積薪之歎知不足挂門下齒有世道責者寧無一扼腕部役回便聊此附復諸

容面布不宜

詹中丞

嚮者不腆園池辱玉趾光重大爲山靈增氣辨後飛書
見寵披裘露素則匪特篋笥之光而已也門下心事如
青天白日襟度則霽月光風令回互幽隱之人見之神
沮魄奪聖朝召用直臣昇以風紀與一大老若宋文
貞范文正者與之同心底道何其盛也連讀大疏於明
紀網扶正學益凜然有生色焉獨僕以齒頰之餘亦濫

竿征彙執節不固竟成小草之任以來未嘗不心儀大
賢長者亦非盡由冗奪特以衰庸過時之人跂胡虺尾
慚負故人雖有區區寸丹未敢布之尺素不謂門下猥
先大誨副以貺儀至於獎飾逾涯汲引非分則有令人
惘然頰赤汗下而不敢當者今天子爲念元元三公九
卿滌心罄慮以承德意真千載一時也語有之邦有道
穀耻也不佞齒墮已盡髮無莖黑如以穀而已何所逃
耻旦夕唯有一歸門下其念之暑雨鬱蒸調攝良艱唯

爲宗社蒼生自愛

荅王中丞

屈指癸酉之秋得接光霽於黃鶴鸚鵡間後凡三拜郢中之寓高情雅誼人間世所希值不知不肖何以得此於翁也一卧滄洲麋鹿之踪遂與世隔而門下敷歷戎臬膚功告成仗鉞甘涼尋阻憂艱再奉璽書保釐關右巖壑之餘爲翁加額者再感額者一而河山阻修鱗羽莫致雖有此心不敢望故人之見亮也而西使遠來猥

施大貺手書慰藉披示肝腑至於中間欲屈中散之駕而竟沮子猷之舟誦之使人神思飛越若接眉宇而聆德徽也石經累神用遂成完書僕雖作老蠹魚其間不恨死矣邇來顛毛盡白髮落無餘豈堪復出供人描畫而橫爲除書所迫加以輦上君子見謂先人沾恩甚渥不當偃蹇以自爲名謀之不審遂鑄此錯門下不以嗤其愚而飾獎之何也關中比歲旱甚米石萬錢賴仁公撫綏不盡填溝壑今聞得雨麥秋甚佳不知東南凋劫

當何如耳偶成奉懷一章并有薄侑不敢當英瓊之報
庶幾獻鵠之誠惟冀亮存萬荷伏暑唯爲宗社蒼生自
愛不宣

與谷司馬

屈指奉門下大教十五易歲朔矣中間僅於鄒鎮一候
起居嗣後避言竄伏田里不能作境外信益深念之朝
事鼎革羣賢彙征明公造國手也不根之謫久已辨雪
推轂之章毋慮十數即同事者起南臺首九列亦已倦

游而蒲輪乃尚未下何也傳聞明公時時策一蹇縱游
名山咨訪異人求出世之學當事者用以相亮不敢煩
以事耶則如蒼生何世貞樸簌且不能事言路以貽玷
知已然用是得謝寵鞅獲造仙真遷化之奇與指引之
切恨衰愚駕下不能有所擬承惟飾巾待盡而已除書
兩及乞骸未允乍愚乍賢不知其何說也再疏懇辭冀
必得請即削斤甘之明公出而宰物如揚公乎則世貞
或且有起色焉然竟不若荷一瓢戴一笠以從公爲五

嶽之游也小刻二種附覽不一

弇州續稿卷一百八十六

欽定四庫全書

弇州續稿卷一百八十七

明 王世貞 撰

文部

書牘

凌尚書汝成

舍姪孫行聊附一啓謝注存之感申契闊之懷實不敢
有所請益而大誨以混俗見許則豈貞所敢當所謂動

極思靜靜久則動念復生惟無動無靜而一歸恬澹公
兩語已是金丹妙訣第要察識喜動喜靜之念原是客
念一切刻去之於富貴繁華中提出本來面目便是火
宅蓮花若僅少欲知足減損穠豔分數亦只是小歇泊
法暫時行逕耳恐未可以言恬澹極則也弟雖棄家塊
處鹵莽銷日即便得片曝滋味何以爲獻舍弟蚤衰勸
案牘入計時已露章乞骸茲所謂以微罪行耳歸後課
農訓子求不失四民職不至迂愚如廼兄也非公骨肉

至愛何以聞此

又

兩日來扶病奉侍雖老丈惓惓欲垂度引而弟實無所得以故僅以寒暄市里之談進茲辱教令人愧悚無已弟自入春羸瘠之甚爲子弟輩所強間補以滋味今漸覺小轉皆爲我喜而獨我老丈責其信道之不篤勉以無生之旨此實愛我之深遠出於兒女子昵昵之外弟欲界一凡夫耳先師不勝元馭父子之恩與接度有緣

一念勉弟膏精養氣保愛色身左右元馭以俟誨期未
嘗有所授也即於機微露一二弟愚鈍無所知即小有
知亦不敢影響妄作以趣異選不幸而有采薪之憂若
遂不起方在輪迴何敢妄證無生上附夕死老丈功名
富貴已極福業雙重不歸之空不得第於此時却便空
不得也佛云無生而實云不滅仙不云長生而實無死
弟苟於此際有所得則此色身亦不必厭離而自不爲
累矣大抵方在灑掃應對尚未敢言學地豈得便有所

戀舍作衆生壽者相耶老丈姑識之不一不一

大宗伯楊公

生平仰止十載聞問不謂於紫氣香霧中得一遂之所
以移病在告不辭擁篲操楫弟覺此鄙吝之身爲春風
甘露披灑却不虛也元馭先生孤介少許可獨爲翁心
醉貞匏繫草室如袞夏甫未能踵門請益秋爽或可輕
刀見過否時事每一聞輒一邑邑翁憂世樂天兩不相
倍其以爲何如家弟造謝聊附不腆之敬扇頭惡作併

希教和不宣

荅王司寇

屈指西曹從翁之後獲朝夕者于今四十年矣一會於
張園再會於行臺揚扈執文論說時事杯酒佐之蟬媛
不休尋復會於漕河之舟中則翁方按部悠悠旆旌而
貞且裹首以病見矣鄭楚之役奉職無狀甫量移而白
簡繼之杜門息黔則翁方將天子命按閱幽薊儲胥之
奏等美營平而造物者見妬俾以憂歸自是麋鹿之跡

相望於越山吳水間而翁方以明堂之棟梁爲匠石所
急貞一社櫟耳乃誤爲啓事所先廟廊之意得非重翁
以銓樞寄而姑難之耶翁於經濟性命之學會通其精
微而以一貫之今海內無所不水旱國用匱竭賑貸莫
措餓莩填道殘骸蔽野念能拯之者翁耳僕之小草誠
悔不安爲櫟也惟有一歸而已賢郎致大集得寓目焉
河伯見東海若而失宜也雅教幣貺何敢當之却有
不腆之侑併上拙集賢郎奕奕清令材用不凡一覲接
忱

如翁之在眉宇也謹以爲賀

趙太宰

世貞門下一故吏也不以爲賤而進之友又辱肺腑交
乃至敝帚薦於華堂大幣私於下橐非一日矣齷齪不
能事言路再點白簡遁跡草莽於影響仇而門下方坐
政府握銓柄以故不敢輒通咫尺之書然至於仰止之
私未嘗敢一日忘也門下遺愛如羊開府清白如楊太
尉今台鼎婁移萬目趨仰即南北統均之地與嚴先生

對峙而爲百僚表率豈不盛哉乞骸之疏胡至再上非
不佞所解也白傳黑首分洛門下少於此公數年而遽
休汝於私計得矣如蒼生何邇者江陵公禍起搢紳
艱居恒與元馭學士言使江陵能以待門下禮待諸公
諸公能以門下所以待江陵者待江陵則休休之與濟
濟兩相成矣何至乃有今日令人愾歎賢郎駿發梓
暎喜慰之私無由一達門下兒子蹭蹬塲屋苟竊一名何
足挂長者齒而津津不啻口出蓋道誼骨肉之愛良兼

之也李駒之友來言門下衮衣東土時爲于鱗特豎一坊曰海內文宗昔孔北海之表通德里似矣然不若門下之榮施枯骨也且康成所得亦不如于鱗快往時陳道易以大誨及二幣來方卧弇念無可托以報者即有所致付之道易所想彼亦無繇自達於車門也外頗籍籍傳渠叵測以謂非人間人今似再得一道易矣貞名若學道者而實無所窺髮種種至有憂生之慮受役筆硯亦未盡能割竊欲小露其拙而使者刺促無暇授簡

俟篇成併舊作成一卷如門下不得請致之白下差易
如得請亦必馳信汝上不至作道易浮沉也張助甫差
強人意肖甫落落竟成底定功門下亦許之否王大司
馬故人而賢相及致聲不一

張助甫

弟自重九徙鄉中舊居叢棘自藩形影相守日啖三粥
以度餘晷惟故人竿尺時有及者而足下訊獨自萬里
來減季俸以爲米汁資弟月來此好亦垂斷唯抵暮浮

兩荷葉不能三合即令至百年費亦不盡所貺非佛頂
蓋乃天竺中法師茶毗後即捨此蓋骨盛淨水於世尊
前供之爲西方繻故彼藏亦自大珍重并嚮者舍利白
甌足稱小祇園三寶矣弟之六尺以付人齒頰幸不即
糜碎而謬被剪飾豈敢頓忘戊寅之辱且筋骨羸散委
跡物外佛奴道民髡鉗已久藉此一壑容棺而已豈敢
飾畫陽喬唐突箕顙足下甫踰知命飛而食肉金印懸
肘政當纍纍胡爲作此倦世語所喻秋時萋菲如浮漚

旋起旋滅亦何足道大槩過來六七少年臺諫不直發
自意氣實以左璫借耳目窺伺羅織爲造化之徑因而
羽翼牙爪者又不下數十輩耳觀古書吠影射影轉自
實繁幸元揆頗善調停虛已推轂遂相司馬世路小當
暫清夷也肖甫每書來嘆王明輔孑然一身若退院僧
而誇足下跳梁蟄蟄振振未已然彼乃不自覺其跳梁
耶近故人劉大司馬一嗣子不肖陷囹圄間氣猶未絕
帑庾立盡老嫗繼之歸骨無所伯玉雖有子多不稱意

世界故缺陷耳要如二甫及吾家兄弟自無幾也釋氏
離而忘之吾儒與老氏畏而持之於世法出世法有無
二義不可不一劑量屠郎作達不已宜其折齒所恨右
文之意微短耳元瑞以吾曹假之故惡少若莫生輩力
肆詆謀方杜門而事千古益篤此曹子當不~~戰~~屈也辱
寄家仲氏物已付其子矣渠爲荔枝所誘不免閩越一
行有兩子俱補諸生而小者三試皆首遂應~~都~~試足下
長器嶽嶽必不作第二義也叔縱不名癡要須讓武子

見父宦游何狀不歌蜀道難耶舊藏兩犀杯乃宋物尚有神彩團欒話無生後取紫酡酥點西京葡萄於此杯對進之當不惡吳織稍精亦可抵裴相國衲衣又拙詩書扇見臆統希麾置焉荷

又

前辱大貺薄有報臆間者闊焉度不能於五千里外得起居之詳唯間從邸報仕籍彷彿若面兄而已雲中上

谷之間小惡皆時多獨不莊一貧者二作多型一

威德一何盛也式遏功成當入司中執法不則以中二千石移大鎮事在匪遠弟生年僅過張蒼相之半而牙齒見讐殆甚今唯以乳糜度日而已乃聞尚有鷄肋我者幸而中沮不然又增商顏一辱也元馭正人第剛腸疾惡太甚昨䟽雖快人意弟禍水一決撥地拉邏又當大有紛紜且聞太倉告匱宣索不已何以竟之吾兄行當預其憂者不若弟之僅爲杞人而已也昨始得汴錄渴欲見賢季賢器名不可得吾家兩猶子及肖甫元馭

之子皆然獨不見楚錄耳今歲貴胃錢神雖絕巍我而
名士之寂寥程義之苟簡恐矯枉不無過正兒子北上
已過彭城胡元瑞坐卧弇園者四日出門後舉一雄却
是可喜事黃幕僚以書來云兄見委使且寘之薦剡中
即死不足以報德附此不一

又

自昨冬附使者致謝後不能再一通問訊雖曳尾途中
未嘗不作天際故人想弟金庭玉關相去萬里冥鴻之

翼猶且難之而足下念我間關一介六月長途流金鑠石不辭暍死喘息間啟械發行幸恍若清風之投懷也齒頰餘生豈堪復與諸少年並進而橫爲造物者所以有此補旋見憎幸未爲冶城輕薄揶揄耳棘居之日吾不與易跌宕詞翰差不落莫亦不顧足下相憐也強敵西牧正與足下所部相關磨墨盾鼻飛組係單于頸固男子事然遠公有云願檀越安穩彼亦無它老人厭事語然不敢不爲兄告也愁霖再旬一望巨浸饘粥之

座白如甌脫計無所復之方賴麴生以解磊塊辱損奉
即付酒家可得百執却取白葡萄佐之耳子與一夕奄
逝幾作若敖之餒家弟爲經紀其喪始得歸僕粗復經
紀其家且以七尺碑報泉下也家弟所領驛傳得逍遙
滕王閣望西山雨然失匡廬主人以此恨恨趙侍御乃
能於跡外相念耶幸爲致聲餘情具別帑不一

又

往家弟西首時業有翰墨戒且傳足下雖量移紫微省

所治猶在玉門以故不獲附咫尺之問而近得家弟書
獨稱與足下相旦夕云盡得京兆扶風故地而守之已
又云兼理外臺篆吾未曉新制所快者數萬里浮萍忽
聚若膠漆耳已又得一鯉銀鈎宛然悅作鄖中觀且舉
向誤詩語若識者信哉損餉二種皆梵天化物始弟得
宋窟補陀大士全像及仙師三十餘篆心經供奉之竊
與善信必勸語更配一舍利足稱三寶耳不五日而致
自足下抑何神也弟詳此件白色而細似是僧寶已製

一粟金小合裝之尚冀靈明感通庶幾康僧會之應云
耳白氎精瑩輕潤目中所希當時世尊受供亦不過此
謹裁作稱量衣擬謁聖師時服之或可藉換凡骨珍荷
珍荷兩日間有致邸報者足下長山東臬而有整飭字
何耶足下四履不西秦則東秦百二十二之地山川風
物皆入錦囊中人間世快事也足下才與相法必大貴
願勿住一切相勿恃有漏因常識取本來面目爲異日
剎那計弟雖離苦海而彼岸尚還不知究竟當何以耳

歷下朽骨必蒙學第兒駒作者厚二第三小龍龍白
有數株馬鬣衣三尺土否言及使人忉怛見父吟興當
益王選人事如何家馭學憲便附此緣此公方持嫌一
札外不能有所致也加飡自愛

又

前所得秦中書及舍利白氎後欲通一問而不可得王
家馭視學大梁僅附數行不知其不作殷洪喬否家弟
每相對輒及談足下風度不減山季倫王平子往往捧

腹至云以一盃酒翫積逋寇於股掌間十萬敵騎遁巡
解散不敢小睥睨誠壯之豔之然不免左顧而唾恐獵
心之起蒲團也造物者既借足下漁陽復移之晉臬豈
霸朝開府須張孟鐸爲宰分桑梓計耶王明輔沾沾以
得足下旦夕第劇稱閣中姬雅能宗門語此是龍華會
宿世根勿僅以蘇家朝雲例待之可也仲歸後王家馭
亦歸與元馭偶明輔矯矯玉立王氏風流似非烏衣馬
糞諸郎奉壘綴手筆現者可擬足下肯作一歌偉之否

甫佐樞廷足下開眉縱復欲從亦萬二印行
二子而三勉旃強飯自愛

又

前有一書附家馭提學致足下休汝時又有數行托明
輔方伯致晉陽公署計當已悉達矣世貞自入園來塞兌
黜聰無復他慕惟二三故人猶時時在方寸而舍第入
輒話足下涼州談笑制敵方畧與消莊浪驕卒事不覺
塵尾之缺唾壺也錢唐之變開府公俛仰此曹股掌中

太阿倒授付之無可奈何即令足下在寧復有此紛紜
言及懣懣臬司遞遷若傳舍而除目獨於足下少愜當
由全晉鎖鑰需時而寄耶或借重秋棘如掾之筆則不
免一坐紫薇堂耳明輔受庇宇下時時相晤語便是兩
冰壺相映聞黃玄甫亦以文事見幸審爾則足下席不
爲無人又陳常侍者老而尚健飯好客意不至衰減足
下當毋爲苦寂寂也此間旦夕元馭而仲氏佐之縱不
能精進不便退果後進中屠長卿文筆不可當胡元瑞

益矯厲異日橐籥中氣須臾集其間以待錄石一

又

黃文甫有一介歸附不腆之啟及刻成佛道經數種計已徹記室矣倪同安過吳門遣信相聞則足下之手書縈繚儼然在焉知二姬踵謝遺孤呱呱安仁之况可想也不佞乃以爲足下方困勁敵二姬捐軀紓難有餘忠矣夫豈直祝融回祿之相已也弟髮種種行盡唯貌不甚枯瘠正得十日斷欲力耳詎便如所聞姑射冰雪前

覩邸報足下偕推浙藩私心揺揺謂可於薜荔中一望
旌節然足下功名在西北今天奪呼韓逝左右賢鹿麋
斷斷將軍之綬非足下誰佩肖甫屬市人倡亂時單車
直入虎穴真過孟賁遠吾曹有張氏二甫何妨不高卧
也明輔比當益清適黃生能作西京語然非公車中物
足下幸有以規削之所云兩常侍供張足銷日陳老而
益爲其謹尤可念也諸經加校訂頗不誤再上一部并
白玉冠得之肖甫者聊以將臆野人獻芳獻所羨早足

下勿訝

又

昨歲有倪令者自晉道吳門以元之八牘雙紙至得聞
兄與明輔相倡酬而黃生亦與捧硯又後閣有隕壁之
痛為悵惘作一書奉慰兼附小物付去又旬日而倪令
以其物返云羊腸詰曲僅以書往耳又三月而書亦返
矣既豚兒應公車卒令其俟吳門欲精作一書及詩
致之方岳邸中而冒寒作汗兩日夕渠又不能待矣世

界缺陷亡論吾曹合併之難卽郵筒亦不易也夏州之
拜覺已遲數月大丈夫杖旄鉞擁鐵騎登赫連臺坐受
呼韓稽顙然後勒頌賀蘭銘勛熟釜亦一快事也肖
甫於笑談間再銷竒變師中三錫文士不爲無用矣陳
道易自汝來得兄數行若猶以鷄肋啟事爲僕喜者豈
雕鶚乘秋厲空乃欲挾鳬鷺與相翱翔耶僕百念已灰
雖兒女眷屬亦以搏沙譬之天竺苦縣吾師也安能復
低眉貴人供後生子描畫哉近以書報見迫親友十進

滋味於伊蒲未宜千里責文役方寸於蒲團尤碍尋常

誓佛前燒筆硯一粥一蔬了臘月二十五事家弟遵

小園戢身其間雖繕性未渠而達生亦頗胡元瑞七言

霍驃騎也沾沾自喜以得御足下云舍瑯琊君而外唯

張君舍張君無所措意矣吾爲之擊節慨賞足下讀僕

前後語將無疑吾談空說寂非實際耶摩訶迦葉聞乾

闍婆奏音而舞亦是宿習偶未忘耳此間沿海州邑中

大水及厲疫死者數萬人今復虞旱聞關中五歲旱而

今忽大水天意將何如也適便附此不一不一

又

前者黃經幕索一書爲報因附之尋有所補書五子篇
計已達矣邊人歎塞烽燧長偃正足輕裘緩帶時耶乃
不以一詩見憶何也上巳日吳明卿見過飲噉如昔貌
甚壯唯近詩小覺膚立耳尋盡出舊作見示終自穩足
弟已久斷筆硯緣不得不爲小破例作數語之導也余
德甫已於人日長往生世所不免且與子龍同

多十四歲噉飯亦復何憾弟所謂情發去來置之未易耳張肖甫謂王明輔成一有髮比芻而足下振振麟趾却忘自己所饗之盛造物馮生豈可於銖兩上較論弟始上乞骸疏不獲請乃復上移疾疏兩日尚未覩邸報想亦當不異也區區不出止是不負初念宰公以八座相啖亦不暇置方寸今段紛紜乃爾國是將何所憑足下試味之以爲尚可出否耶世事一切勘破獨身心二境尚未盡了了則揮手入光明藏矣

又

春來聞南牀獬廌口信信及吾兄意極駭恨及覩與大同
胡君僅各一疏而疏辭亦不若彼二子之甚以爲廟廊
必有調劑不謂舛錯至此夫以文學材氣如兄故當不
爲絳灌所寬然何至併萬里金城而弁髦之尋當數行
詰肖甫肖甫亦甚爲兄扼腕欲於敘功疏內擬移留景
云曾與太原道之弟卽有數行致此公矣想當不異也
輦上君子亦尚有鷄肋我者下及人益

老諄以廢托跡方外癯瘠成痼安能負事言路少卑
此曹子於頭上安眼尻後着口有何準繩足憑也欲馳
一介造兄廬通候舒懣懣之懷而十年絕境外之交老
馬盡僵無識途者而大教復先之矣二詩宏麗精切如
聆謦欬分俸之貺又似傷惠如何旬後家弟齋捧北上
令一蒼頭附至宿州取宋道訪蔡致不腆之誠先此附
謝不宣

又

前者材官去空城附之然中具一消息想當不浮沈也
計茲時已得代還里玉樹盈前杯酒團奕不煩呼客恐
大蘇高牙紫衣將矣不與易其暢也家弟以齋捧歸將
北首而得南容臺之報此雖散負亦自清簡若兄果如
大司馬所擬署留都九列暫爾婆娑度無不可即用肯
甫故事今不少保耶元瑞雖落夾道我時家報舉二雄
脫帽歡噓抗眼一世唯爲兄不平耳見父今移何官得
何地叔氏賢器不免復於小戰也爭雅意益裒然也吾

二子二姪俱遁上干鱗舊有句云意氣遠從我輩生功名且付兒曹立駒已矣唯兄與阿敬三人共之耳拙詩二章并有薄侑去力弱不能多致外信陽王太史書物煩使者轉致得數行以報爲幸

又

使者水陸二千里單行度歲驟見之令人心折既出橐發書則又爽然神王也御史中丞休汝從車騎饗牛酒賢於袁將軍十倍宜足下之耳熱稱快也弟徵書旦夕

且下縱安石風流不能長有東山之樂耳弟處息一小樓無異頭陀行逕而不能不爲人作法事九月遘一異人依方行之大似有證驗恨爲米汁墨汁見染不免有作輟兄所云輦上君子會取弟作頰上須麋要自非急弇中一曲自謂不減鑑湖也肖甫園玉而歸岷峨之間大可巢窟却爲國家輕捨一棟未見堪代之者如何如何精鏐油玉成二卮二斗又損秦中二復陶諺所謂內外俱牽綿矣山人無以爲報殊新昔案列處具

又

使者歸有八行附訊所喜流言盡彌廟堂佇屬尤厯徵書當旦夕下矣今年花事甚佳弟雖老強自力以米汁償之但不能作兄跳梁少倩間耳方司空與家弟爲兄周旋良苦司空却以流言賜罷家弟亦少涉搏飯之疑尋而釋然坐此微滯推遷世事反覆殆同兒戲何足挂齒唯是先君子獲一伸於臺使者宗伯兄之鄉人也

面許二相君以贈官而忽中變僅予祭葬聞亦兄之鄉人阻之故然上恩德不爲薄矣弟老無以爲報學道無成所欠一死苟飭先塋少露寵光當於傍鑿容棺之穴蔽此醜質何所不道還兄得無訝之否偶信陽王太史人便附此不宣

又

歲事蕭條方引疾上書杜門待命朝與病妻夕與病弟相對甫事醫藥即憂衣食鬱悶中得兄遠使手札爲之

破顏唯是損餉器幣過隆非巖穴所當耳又辱念及先君子錫以奠儀緣已辭之邦君大夫敢告先壟而後附之使者上恩深重得沾兩祭全葬復有夏卿之贈誥祭兩辭皆極華袞蓋二相之力而太原居多不唯死者若生生者亦可死矣獨南樞一除翻爲蛇足病弟雖見減損而根株未拔兄念此光景能忍心而出乎業上疏懇辭未知廟廊之上能相亮否兄材高一世關西前後三政嘖嘖人口而未見新命良所未解春時獶狂自鳴自

吠曾密叩之太原未嘗有所聞也甕牖繩樞之人何所
任德使旋聊此附復扇頭一詩志臆兄似少一段佳事
耳薄侑希鑒存不悉

又

歲杪懷人而足下遠使手問至奔中大快然是時僕已
勤徵書矣而足下未知也家弟病矣而尚未有它也春
初而僕所露章乞骸者不獲請一念不堅遂成小草猶
幸江山名勝帝城風物足以游目而抒吾之竒勤焉詩

歌序記之類庶幾備金陵一裨史而閏夏行李病者漸
欲遂成異物聞計之頃肝膽寸斷自是哭泣無節飲食
漸減心志皇惑形神沮喪又值比士之歲故鄉親友
集加以秋令奇熱襖襪應客慰唁之札一一疊報而好
事者復用文事見苦譬之甌窶汙邪而受積潦幾於此
中浸殺益未幾而肖甫之計又至矣骨肉知己如晨星
漸疎計吾曹獨足下與明卿伯玉在耳僕長於足下七
歲在世之日當不乆何堪眼底有此零落業上疏乞骸

旬日間得俞旨即輕刀南下矣足下向誇擊鮮浮白左
挾燕姬右擁趙女於少年場極豪舉之致僕頗不以當
心然家弟受閩博士家言矻矻不休以孽茲症歸而左
繩右矩不免於死有閭頭陀者六十年不近女媵收歛
若嬰兒寒暑一衲孤行人間前一夕立死矣足下計故
非左但吾老不能從耳甘涼之間兵變訐起足下造國
手乃不借以一刀圭之寄而縱之摩摩乎竊所不解雖
然弟亦非所以愛足下也必苦不得便而吳老去聊以

奉候方司空喪尚未能弔之如何餘不次

又

冬中吳山人游汝有尺素雙絕之附因詳仲氏不祿耗聞我同戚冀分我哀不審其不作殷洪喬否既而足下自得計於潘大夫所知已之痛發之十章遠使千里衝冒冰雪而走我金陵俾致梓里披緘跪讀天真爛然一字一淚會有小奴歸即寄之四從子矣緣亡弟遺言不敢勤故人片楮之貺輒以便宜附返止令孤兒奏些陳

書於几筵而已弟以季秋杪上時事典禮兩疏小解竿
慙孟冬中旬繼即陳情乞骸中間杜門四十五日苟完
筆硯宿負因料理亡弟詩集先已登梓尋次第其文付
之孤姪輩俟完當專一介九叩門下以冀珠玉之引旦
夕草行狀成亦當有所請茲尚未敢也燕中消息大似
不佳未審天意何如耳弟開歲後當再上疏以必歸爲
主得遂首丘無恨蓋棺足矣足矣大梁鄉書至賢季令
器遂爾寥寥若衰門之不振固其宜也長垣君可一轉

否胡元瑞赴公車病阻瓜洲伏枕五十日而尚未起今
須得活恐無復北理冗次不一

與李臨淮

門下之握符留省彼此一通問餘則於扇頭寄音而已
乃至杖鉞六軍當齊汲絳勃之寄天子所憑人臣無兩
而不能馳一介之使操下里之音於龍江祖道自附於
鼓吹鐃歌之末固嬾嫚之習成然亦巖廊丘壑之分絕
故也嚮者數聞彰武之治師隱然有古名將風而門下

繼之更復琅琅弟橫梁賦詩彰武或恐有所不暇也無
論彰武自開國迄今振脈管於蟬冕者誰歟定襄其皎
皎者爾即公家武靖王博學好文爲一時東第之冠而
遺言散佚頗深鳳毛之恨此道得公而始暢要之古亦
未盡有也僕棄官學道一無所成猶欲理殘物而用之
雕虫之障深於鴆毒搏沙之緣尚自隳骨坐視此身在
苒復墮苦海耳家弟在容臺依然有六代三山緣差不
惡也適故人之子王將軍元周履任便附候起居併成

一詩書扇奉塵清覽餘唯爲國自愛

荅馮方伯

明公坐黃鶴樓俯鸚鵡洲芳草則當念能賦之禰正平
晴望漢陽歷歷芳樹及聽隔江小語則當念能句之崔
左司李供奉南樓翫月次當念庾司空屐聲與胡牀詭
浪致談俱舍不之念而乃念弇園拳石勺水與中庭一
方之月又因而拳拳於齒頰中殘物若不佞者何也母
亦明公之過爲長者將不佞如嫫母魑魅或有當於一

嗜也耶明公念弇園不知不佞貞與此園緣欲盡已併
家析授兒子輩別構草堂僻地僅容膝旦夕披一衲入
此中蔬食水飲了此生矣明公驟見此當駭以爲誕且
怪不知敗子回首曉作家緣但恨晚耳吳民望明公如
望歲然以孫中丞公資簿言之似未便轉移明公固全
楚德星也將非吾吳民所得有矣李使君在吳興若神
君吾吳恃以無恐誠如尊諭方侍師野次草率報言不
盡伏惟台慈鑒亮不宣

又

僕自枘鑿世法縮足一團焦中朝暮圓覺黃庭數卷而
已不敢復論天下事而自壬癸間乃有以相聞者然轉
聞之轉不可解如明公天下才也毋論其他即吾江左
萑苻蜂起之後明公一下車而更東約募材武旌旗鼓
吹肅然如李臨淮之將朔方諸盜魁皆鳥獸散去黔首
得不廢耕鑿者誰力也三事在步武而力壅遏之必盡
屈其揮霍一世之精神才略而歸之牢慙寂寞之地是

遵何說哉昔者楊遵彥除趙彥深用識者謂將欲行千里而舍驥駮策蹇驢將無謂是也雖然天逸明公以盛年而假以餘晷明公所靈承之而爲垂世出世之業則大有待矣豚子素乏家教偶爾猖狂一鳴謗薄非分但有慚懼獨叨從賢長君後貞得借以脩通家之契於門下用爲慰耳拜貺過渥飾獎過隆皆非所敢承持懼懼不恭之咎勉爾拜嘉使還聊此附謝并布不腆之敬伏

冀弘納



弇州續稿卷一百八十七

欽定四庫全書

集部

弇州續稿卷一百十八

九

詳校官編修臣潘庭筠

侍讀臣孫家鼐

勛

總校臣楊懋珩

校對官檢討臣鍾鳳

纂修官臣鍾鳳

欽定四庫全書

弇州續稿卷一百八十八

明

王世貞 撰

文部

書牘

顧憲副益卿

前者觀一上人來道公輕舟並訪斗靖方欲掃松花煮
芥菽以待而雲雨盡無者不可即尋稍知以簡書故陪

道東邁當赤城霞起飛瀑界空時以一瓣香遙禮即隱
隱靈輶何必訪此委蛻丈室也錢唐脫巾之變意謂非
公不能平見肖甫司馬論偶合亡何而公果有錢唐轉
埽彼奸兇於杯酒談笑間二人真人龍也使廟廊用才
盡如此天下更得如公者三四人吾曹卒當樂死無慮
矣元馭大故頻仍憂悴不復可堪僕甚苦孤立且名為
棄家而家強來蔓葛又不能盡掃筆研障恐不免負公
等期如何子念頗言公善病狀公才大於吏牘雖游刃

無金牛食少事煩尤所當戒見承父飲亦不能如前大抵長淮以南人至五十當別作一番養攝可爾子念俠者感公持病延禮津津不置口豈便以干襄陽辛長沙望公二嘉紬係公遠念不敢卻而道人無長物掃篋不足為報如何唯公亮之而已張守古循吏也喻丞古名士也公冰鏡自悉當無俟鄙言不一不一

又

始有稱足下豁達慷慨奇男子者既而窺見緒餘一二

則以為姚紫微李贊皇其人也嘉靖閣盤踞之於

謔浪杯酒間露超識玄詣悟嚮者尚見其龍之似耳僕
之不能出亦只是不忍負然諾一念非敢以為名亦非
敢他有希覬也既得請而稍覺其有味耳別後猶復受
筆研役不休以此深愧足下故自重九徙處鄉落植棘
自藩謝絕一切酌應葷血味亦絕不沾口唯晚寒猶舉
兩叵羅晝日無事拈烏絲書小絕句一二以此知迦葉
定中之舞難盡洗耳足下旦夕當杖鉞而尚奔走三輔

故所未解昨一晤王承父於王宮端墓所得承起居歸
不半日而拜足下教貺遼參大足飽秦蜀可以禦寒念
我至矣元馭先生受主上眷若此誼不可不出而家馭
病甚所舉兩兒旬日內為異物太夫人念之以此刺促
行計如何深山道人及此亦似育兒作臂蒼走黃語也
當不滿足下一盧胡春寒自愛

又

托之簡尺中而不知神交之契固有在簡尺之外者

易云書不盡言言不盡意今者拜遠使手書則言意亦略盡矣分俸可以助廉三貂可以禦寒珍藥可以扶衰此皆老人所急然得無損中丞饗士之帑耶比歲來天下皆灾而遼陽為神京左臂呼吸生變非老兄為之撫摩振攝幾至成脫巾之變矣中州倚兄如長城搢紳望兄為赤幟寧能奉寬東山朝晡視大夫人膳即把酒杯拄頰看長江雲物耶弟眉毛也何足闕頤頤間事昨歲

為上恩優先君子於地下而留樞之召繼之輦上君子
俱謂不當復偃蹇朝命者為謀不審倉卒而出過時之
人觸處皆成悔恨且遂不獲視亡弟含殮此痛何勝亡
弟之精全耗於閨中一任而奔走不已遂釀成膏肓之
病醫藥之伎殫而莫效幸四大分離時能自力去戀去
怖遂不昏散耳已為收檢其遺文付之剞劂名業頗成
有四子而才目可瞋矣獨餘六十老兄形影相吊生趣
道盡何以過日乞骸之疏已下銓部倘得遂歸計尚可

收拾半殘之軀視其寔窳也嚮老兄尚不欲太原公輕出於弟可知又不欲弟費心思於雕蟲之技今皆相負老而受役太倉粟復受役子墨客卿何以戴面目見老兄大疏叙本自弟意緣未奉明教藏之家塾歸即可以命筆矣萬一不得請當遣人取來卒業而後從事非若他文之可以苟且唐突也舍甥曹子念篤於誼故亡弟身後全得其力快閣成索如洗矣第漸衰恐不能勝塞外寒承尊念當以諭之承父訪老兄至無錫以陳生一

泣遂作剡溪棹王辰玉書來盛稱之以為山人中聖賢
弟以為不入都門可也嵇呂之駕何惜三千里肖甫長
逝於公私俱可深惜昨遂有祭塋而無謚國家報功臣
之典非吾曹所知也不腆無以酌萬一如何餘具別席
不悉

王大叅陽德

前月呂氏人回拜公手教諄諄肺腑語至於精絲古器
妙畫種種瓌寶山房展視眉宇間皆烟霞色也感哉何

可云喻公雖脫屣時榮高居曠覽而政府方需材用艱
鉅之寄恐終不能釋如貞真所謂可笑可詈人也若一
念火不息則一身又墮齒舌矣自公離此景界又別其
詳不能具陳或從容子念當得之耳陸司空歸後再相
聞尚未獲面俞仲蔚遂成異物錢叔寶亦幾游岱聞康
山人復將北首新命嚴切恐亦非優游地也加飡自愛
又

忽忽奉違道範且五歲矣昨春時荷師真汲引棄家謝

世事束身入一茅菴中耳目盡廢遂忘與門下相聞屈指公除已久召命且下江南父老俱切雲霓之望第聞東山志堅區區世緣恐不足仰累耳貞出沒苦海雖未望彼岸小即安流澹寂餘味無由分供所草曇陽僂師傳附覽倘有一二可採擇者庶幾願吉小助耳餘情曹子念當悉之

又

昨冬承公祖垂念兒子誨勅丁寧藹然音旨肅然

然長者風每與兒子言之戚戚感動也永嘉琬苞當以
韻勝福橘非門下見憐無緣復沾此味子念時時稱門
下悠然之樂遠出右軍分甘上籍令朝望推屬不敢以
一徵車奉易東山茲趣方與家弟共之而已區區行徑
全是一頭陀而毫髮無所進蓋舉世法之所謂樂者稍
盡去之獨所謂苦者猶見趣不能舍也宗伯昆季至今
猶在委頓中無以相解如何賢長公澹然自遠蘇眉山
所稱范純景真學佛作家無緣一叩質為恨子念上謁

便草草布此加食自愛

又

小僕從子念歸者得公手教嗣後山川阻脩彼此間濶
入春風雨連綿鬱鬱無好思偶得小晴從常博士及族
人都運詹錄汎小舫問梅花使者以書及筐柑至即取
分嘗之風味殊絕得示收藏至三月間更佳兒輩饒口
恐不能待也舍弟在金陵當略寄一二右軍有分甘帖
可作兩家故事矣吳俊伯與公司甥館其子稼澄表表

才士將過訪幸善遇之

又

自門下高蹈遠引偃蹇時趨有威鳳千仞之風而山水之佳麗服御之饒媿所以娛蔗境而適龍性者誠令人羨之妬之今者拜手教則長公西華先生仙逝而羣從中有能代應中外者亦繼之僕前歲冬仲失從弟望雖無它長而亦能以酒食相勞慰今者閏夏六月遂失吾敬美弟矣何兩人之不幸之同也世界缺陷自昔而然

弟西華先生已逾古稀林棲之日長似無可憾而亡弟
僅五十三於世法甫暢遽化異物僕更失足一出塋繫
馬曹至不能視含殮其為愧痛又豈可同年語也張肖
甫太保與吾州江侍御亦俱於是月不起黃楊之厄至
此哉辱委西華先生地下之托誼無可辭但目下責文
如責逋小寬至月未必脫稿送賢從比部君處玆果拜
賜附謝

寄敬美弟

數日前曹鳳陽有信云吾弟決還言而不明所以意甚疑之昨始接吾弟手書初得病狀令人憂駭尋審向愈為之稍解既而覽所擬上疏稿與乞休之意云云且悲且喜且快且服不知精爽之飛動也吾不如遠矣凡衆情所謂吾弟春秋鼎盛才識精練物望漸歸前路漸暢一旦捐而棄之以為疑且惜不知吾弟保此完身以答丘壑保此完志以免濡染不盡之福後人享之不竟之用兒輩繼之亦缺陷世界中一佳算也且吾所私慰

者有四桑榆之晷朝夕聚首剖甘娛目足以老死此一
慰也家東人事時一分任教授兒輩輒用相寄此二慰
也頃荒互發洋洋盈耳至於文責亦得小寬此三慰也
世緣盡時有所付托不使俗塵墨我去念此四慰也記
別吾弟至季冬朔後愈悟宦路之不美非唯畏譏且恐
失身又念四大不調剗那難料諸所耽好即須割捨一
切享用漸覺無味欲掃而空之又無巴鼻忽忽不樂行
入新年忽自調暢元日賦詩尾語若識蓋未幾而遷真

之大誨至矣今已告一蒼誓絕仕念斷色根諸凡滯肉
之數十去六七日損一日三兩年間可作淨行頭陀矣
計吾弟亦於茲時讀道書習靜功若有得者奇哉元馭
正是同盟不知可容三人否今遣王經相迎旬日後當
再遣信也外詩二章志喜並近作四律附覽不一

又

與吾弟分袂時落日黃流離態滿眼而意殊穆然知大
道無係尊鱸可待耳抵闌則已街鼓動矣月色清徹可

鑒毛髮西風作寒膚粟驟起念吾弟旦暮馬蹄間殊不
易縱新豐斗酒可解勞終不若從兒女擁爐煨榾柮也
與元馭丈讀疏辭幾淚下吾弟堅至若此何患無成第
出處之際貴於無蹟免了棘事小慰三秦豪傑望俟除
目下拂衣歸臥尤自脫洒若移疾請告一涉紛紜恐不
無牽阻幸再酌之金生云刻江西贈行詩文滿一卷書
畫佳者聞亦攜數種不訪毛仙翁張氤先生故事也香
靈芝已收得不知作何用可於淨名室中共佛否關中

諸賢墨跡為我收一赫蹏母論小詩或竿尺皆得老翁
作兒態由習氣未除故也騏兒別時苦予針砭勤學修
行便是人倫人倫即道也

又

得吾弟書具審已履南康任匡廬在屋上彭蠡在屋下
深秋紅葉窮冬白雪嵯峨蕭瑟不可名狀真仕境之僊
都息心之妙軌也既吏牘稀簡民俗淳樸粗可跌宕文
史從容翰墨以順應之何必憧憧丘壑承所評鴈吾詩

文二端之業大都士龍之好兄而詞藻豔發要非清河
所可幾及中間持論往往破的如所謂離觀則邈若無
聞輾泊則天然一色字險者韻必妥韻奇者聲必調天
壤之間若為預設又所謂大能使之小小能使之大虛
能使之實實能使之虛遠能使之近近能使之遠斷能
使之續續能使之斷雖言大非吾所敢當要之自結撰
以來未有造微極深者此者記吾守尚書即時稍一搦
管得致語沾沾與吳下

昌穀差肩是矣可求

至讀腐古文心則一之又一時驅石若晉江田園二

三君子有作每讀竟輒不快者浹日以是盡出世嗜劇
心古則詞壇之盟歷下牛耳當時亦未敢以齊楚之賦
而歌代興也天不愛年苟有所就庶幾二三子之末不
忝忝於世足矣若乃標赤幟挾玄珠必致之境斯之千
古何期定論近出友于於其身親見之豈不快哉世無
真才才乏通方二語灼然惜不能浮三百大白賞此耳
所喻本寧近觀其文筆矯矯吾弟宜厚集堅墉避其焚

舟濟河若於詩則以偏師待之而已其他固未暇勞齒
頰也與胡郎論已前當刻置集末文未墜地必有賞音
者因附答大致云

又

所示千文書法圓熟秀爽非唐人不能題尾半行稱歐
陽率更恐不必爾率更聳肩露骨與此殊不類其卒在
高宗初正儲宮時當時集聖教序者不聞避治字諱也

但以唐

賈府

題字

卷下有

書

卷八

華書

字尤可喜又考此書為李繁藏物中曾落徐鉉歸省手
焉知非竇泉所賦諸賢如裴行儉孫過庭輩耶

又

前日午食時應門者歸出除目相示果不負前擬也吾
弟年資既鬱望實復峻啟自山公辟同貢禹羣好見迫
清時難負公憑至便可束裝南首矣昔人所稱琅琅關
閩之學者前後北面稱弟子故亦非偶乃若區區所祝
吾弟在公雖勤毋耗神用遇境雖濃毋忘恬憺物情雖

轉母太收采國老雖調母廢薑桂出擁節旄則沛然膏
澤入陪旃席則侃爾正議勇退初念長自急流持之使
可籍手見我仙師則老兄之念畢矣若乃先公未究之
意與有待之事吾弟固饒為之非我所虞也計當東歸
辭墓未卜何日蹲鴟薯蕷鄉所不乏佐以濁醪為青燈
促膝小語勢似不能入城無虧各天恐遂千古或操一
輕舫作十里別也

又

昨盛氏人回得手書知瘼火雖未洒然而勢却漸減所言汪伯玉齊雲之約誠有之蓋前歲伯玉與二仲過我酒間以為前後凡五訪我海上而不一報將為千古嵇呂所笑爾時慨然許之春間特使其小從子來約為九月之會又欲南要吳明卿李本寧東要屠長卿徐茂吳吾意殊不樂報書力止之但以扁舟楚服攜兩僮一登山而已然老來不任道途之苦意尚未決今據吾弟所聞乃爾便堪攢眉辭社豈能把臂入林也此兄好奇而

重文事業已世弃不復點檢樂彥輔樂地故自足乃欲
使我作失行老嫠耶夜來卧小樓樓之下非常三響恐
非仙師警策唯有節飲省葷俟盡而已此外却無大愧
怍也贅者于生持書求謁適有所欲云不覺媿媿

又

前有數行附贅者于生去中間無他言唯道所以不能
却伯玉兄之故將來恐不免負約耳聞喉間尚有微碍

凡是廢人
於此
處作書
不可不
預言

但寄一信香及片紙書不傳人誓來焚之佛前即脩寫
寄去不必遠尋喻君也諸文覺駟姪有精思不能全媿
臨亨爽淨少筋兩騷姪朗儁有勢病小在多然得儁必
矣此間堅吾却不凡意氣凌駕驕時露神采駿頗見風
韻而不能純從此百篇後乃可望其成章茲則未也吾
於去歲中已決意鑿坏即謗沮侮弄俱作山神伎倆觀
無所復恨時時見除目却與吾弟不相涉乃至遂恡一
陪得非前口語猶在此曹膏肓耶長干花下稱吏隱人

何所不佳邇來裁抑言事少年至矣而獎進舊言事臣
不已當軸者一段微意亦自佳哉於本月十三日夜四
更大聲發於中樓之下楹若轟砲又似鼙鼓者三侍者
皆魄奪為之攬衣起坐而思曰得非仙師示警耶將鐘
鳴漏盡時耶甲申之末示驗矣死亦何足畏隔生何不
可日有塞愛河斷疑網以俟期而已尚不能如劉伯倫
付之一鉢不免密令政僕覓戢身之器俟先府君諭祭

後於傍穴推堅土亦不鑿桓家石也賓所齋疏計一

緣出自判老意必無齟齬但渠若竭志不解領兩部文
移下府大約祭期多在八月蓋盛暑中勞府主又祭物
易壞而一時有司鄉士夫宗戚各欲有所伸不便也碑
亭已定址五月可豎其詳政能悉之兒輩無可替心力
者吾弟不能歸駟力亦自不少撫公必欲叅其事者道
府亦須一及韓守似不免奪俸矣如此賢守而推挫其
精采可恨也古林公即北俟其歸而謝之鄧直指却不
容後即薦語亦自知已徐太學病篤尚與吳競不已兩

虎不足惜第諸長年三老漸就死地小不忍耳盛大哥今日入土矣餘不盡

又

戴玉陽歸得吾弟書具悉近況時事可憂物情多變皆不足縈慮唯是吾弟宿病根未盡除既不甚轟飲諸內外事皆裁減而噉飯小逆輒與痰俱壅必吐而後已將來防其隔塞此時盛後和往太平治臺使疾可遣人邀之入京一診視至囑囑吾弟既請急入京所謂盡心

與分而已家事任長可以無歸北轉既勞於體面亦不
為美食指太衆匍匐道路殊非雅觀莫若且住留都來
歲夏秋作滁陽醉翁亭主人未為不適祭典之期擬於
九月望後三日皆安月末當遣騏兒致書俞府君聽其
自擇時序涼冷潮汛方壯便於舟楫月盈之候通夕可
行第其時邦君大夫鄉黨宗戚多以饗奠之禮來於豎
廠置酒餽餽之類費頗不訾至行謝又在其外原領四
百數恐不免增十之七八況又未便入手兒輩索澁無

可處分勢必行貸又乏主者何如颶風劇惡水鄉隄圩
復有隕者高鄉幸不十分損昨偶行田尚未蒿目初亦
傳荆老不甚肯主張荒事非也蓋上意以關中封土石
上呈觸怒不免人人自危疑耳今臺疏疊上羣呶紛然
大老意既稍強司農口亦微柱必有可望者吾向所以
欲各臺及道府連疏正謂此也昨忽傳抑之辭太宰而
讓及不肖不知何說要之老僧不見不聞無盡而已先
壠立兩碑訖工便荷一鍾生埋土中亦足何必添足於

蛇也老妻兩日小安過此酷暑或可無大故臨峯弟粥
飲日不過二甌艱苦非常肌肉消盡亦只旦暮人耳邵
圭峯瘍重痢亦重死活未分少瘞以水災憂鬱而死二
君誠癡漢唐婁江亦物故矣死生細事不煩我瞿曇老
師處分即漆園叟便可談笑了之韓守治曹氏之惡僕
又治荆族之無賴者雖衆口稱快却不甚宜賴其信吾
言差有挽回也吳僉事得荆老痛詈之書稍息克炤然
於中證轉急提婆達多自豪傑可敬可敬崑令以吏盜

庫多所追攀物議頗及之未免為解紛朱少南訟事幾
大敗調停之功不敢遽任南北災荒宮邊浩費諸老技
力漸困將來未保稅駕之所滄海橫流一葦不安吾曹
亦未便是高枕地也蕭生驟瘡尚遲兩日附此信不一

又

作書後偶見邸報袁裕老相薦之語深篤詳至乃爾此
兄故亦相知邇來頗簡略此段殊出意外部覆雖四語
而推許頗重居忽自嘆毀者譽者前後一人耳雖然亦

更自警省毀者失實是以受上真見憐譽者過情恐不免為造物所忌既奉有明旨或不免一推豈敢偃蹇以為名覺得身中亦漸衰且初夏聲警非常不可不唯後悔以是言之終不若鑿坏之為愈也邵圭峯一疾不起雖其自取亦自有可憐處臨沒之際唯感吾兄弟兩人故當爾也泰亨兄弟事復大決撒今亦粗有頭緒矣少葵死後甚有紛紜亮臣自長者其兄大抵無人道蓋不止一端也前見吏部題先大人誥命計其時已撰述吾

弟有便音寄荆老托其先寄藁本來蓋碑石已磨專信
鐫刻而領軸一歲自有次數故也行祭後數日當即遣
人上疏謝恩及致諸老書問吾弟宜預收拾以待偶檢
舊刻綸音世貴錄失去二十餘葉今補刻完要增先大
人贈誥諭文及吾弟福建提學勅諭於後可即付來餘
不具

又

連日兩作信方付去人而吾弟書已至初三夕之夢所

謂紅花者既與症合若精心服之必驗石竹洛陽花不
知其性云何當時駱師在家從先伯父受旱蓮合烏鬚
藥而已豈此老九十四齡之徵耶吾弟發明年掛冠之
興亦是一時感慨南曹九列幸無干繫黏身儘可婆娑
仙師所傳恬憺二字大旨在出處外吾州風潮於花初
不甚損以後冷雨熱日侵凌不已今則生意漸少耳稻
尚無恙終不比崑山之甚也吾州作災九分八釐吳縣
七分餘俱十分想內意不能全美要亦不似往年崑士

夫好謗多怨何足憑也老荆終乏起色於月日殊可延
華壻所傳謬甚撫臺二事下邑未嘗遵行不必作書諫
止武三甫到家而婦娠在危篤餘具前紙

又

前自駟姪歸得吾弟病耗寢食不寧故遣奴承恩相問
尋從駟所見弟手蹟知體中向清彊且盛後和安意在
彼調理使我慰心聞僚長已為上疏部無不覆之理杜
門澹圃形神俱佚病蒂蕩除自是第一笑也郡守初定

十六日行諭祭禮以待舊兵使遂至愆期是日盛執
至者凌楊徐三大老而下何止千人冒雨衝泥匍匐委
頓暮猶未絕更兩日亦復纍纍十九日大晴守臣始至
行禮男女挾道何止千人嘖嘖嘆賞宰木生色丙舍銜
照惟是捧誦玉音肝腑寸折血淚涔淫不能自禁耳莫
祭之盛目中所鮮而齋發亦自不訾賓主兩敬屠宰烹
燂大是慘心業無可奈何且與印上人計誦經懺度而
已十六日之雨低鄉復增淹沒高鄉稻亦多爛花遂無

復餘幸傳聖恩蠲免不止屯膏吾父子尚可糊口兩
日間只得詣府及各邑報謝此番勞費心自甘之瞻美
骨脫如鬼而聲氣尚不衰兩日進一留京人藥稍能飲
湯乳或可希覬萬一二相能為民請命而大原猶見苦
心然將來隱憂尚不止此今國本國脈國是無一可著
口處鑿坏之人尚不免憂天當局者可推矣南都公卿
以不俱賜奠吾弟計何所報答若書則至聖姪或止云
人寄上也餘不悉

又

前者得書急令王鯉歸看雖知吾弟定見定力從容脫
灑計必漸安而此中終是憂疑周氏昆玉云曾面見吾
弟容色小暢飲食時進但讀析授一帋字字肝裂又分
惠及三子使受者不安兩日後李相來復得信及駟姪
駿兒書知於立夏之日痰壅頓解進粥不逆喉腥亦除
寢止穩快喜甚喜甚新齋雖效亦宜酌量少服從此日
減至秋不發矣此間陰雨連綿米價騰踊北方流移之

民接踵而至五城日報死者以千數其他郊郭之外又不知其幾京尹煮粥噉之可至五月吾力勸二司農出倉米繼之除掌科疏極好而誤言平糶二百萬石以救近省不知倉米實數二百六十二萬石每歲贍卒八十二萬石僅有三萬之積耳戶部已覆奉旨而不知其說云何咨尚未到江北搶掠處處蜂起聞吾鄉太湖中有船數百具酋稱順天三物情洶洶不知吾弟所聞如何吾欲極陳一番以了此身事但不土要須無益於事

茫天地間不知死所管吾弟病且以事相消日也

李相回附此不一

弇州續稿卷一百八十八